

BUSINESS

Info Newsletter

U ovom broju čitajte:

- ◆ Održana VIII proširena sjednica Upravnog odbora UPFBiH
- ◆ Prihvaćena inicijativa UPFBiH za izmjenu Zakona o porezu na dobit
 - ◆ Održana javna rasprava o Zakonu o štrajku
- ◆ Na sjednici ESV-a FBiH podnesene dvije inicijative - za izmjene i dopune zakona o porezu na dobit i privrednim društvima
 - ◆ Prvi sastanak Ekonomskog savjeta Vlade FBiH



Održana VIII proširena sjednica Upravnog odbora UPFBiH

U prostorijama kompanije Feal u Širokom Brijegu 01. juna 2017. godine održana je VIII proširena sjednica Upravnog odbora Udruženja poslodavaca FBiH.



Nakon što je jednoglasno usvojen Zapisnik sa prethodne sjednice, Narativni i Finansijski izvještaj sa svečane Skupštine, kao i potvrđene odluke sa Izvršnog odbora, prisutni su raspravljali o izmjenama i dopunama Zakona o porezu na dohodak i drugim inicijativama Udruženja.

Izmjene i dopune Zakona o porezu na dobit

Predsjednik Upravnog odbora Adnan Smailbegović upoznao je članove o namjeri da se pokrene inicijativa za donošenje izmjena i dopuna Zakona o porezu na dobit, te da je jedan od prioriteta u ovoj inicijativi da se poraznom obavezniku umanji obaveza obračunatog poreza za onoliko procenata

koliko je visina investiranog iznosa u odnosu na ukupan prihod u godini investiranja. Prijedlog je također da se proširi pojam investicija, jer je neopravdano zahtijevati da se samo za investicije iz vlastitih sredstava ostvaruje pravo na poreznu olakšicu.

Direktor UP FBiH Mladen Pandurević naveo je da Udruženje zahtijeva oslobođanje plaćanja poreza po osnovu: investicija, izvoza, zapošljavanja i zapošljavanja invalida.

Na UO je predloženo da se zahtjeva i ukidanje akontativnog plaćanje poreza na dobit, kao i da se insitira na oslobođanju poreza po osnovu izvoza. Prijedlog Zakona o izmjenama i dopunama Zakona o porezu na dobit bit će upućen Ekonomsko-socijalnom vijeću Federacije BiH.

Opći kolektivni ugovor

Direktor UPFBiH Mladen Pandurević je obavijestio članove Upravnog odbora da je Opći kolektivni ugovor za teritoriju FBiH na snazi do 22.06.2017. godine. OKU se može produžiti sporazumom koje su potpisnice zaključile najkasnije 30 dana prije isteka važenja tog ugovora, u suprotnom će se OKU primjenjivati još šest mjeseci od dana

njegovog isteka.

Upravni odbor je donio odluku da Udruženje neće prihvati produženje važenje Općeg kolektivnog ugovora, niti će pristupiti pregovorima o njegovim izmjenama i o zaključivanju novog OKU.



Nacrt Zakona o porezu na dohodak

Predsjednik UO UPFBiH je konstatovao da je novi Nacrt Zakona o porezu na dohodak trenutno u fazi javne rasprave i da Udruženje poslodavaca FBiH aktivno radi na formiranju amandmana na Zakon. U izradu amandmana uključen je i profesor Ekonomskog fakulteta UNSA Mehmed Jahić.

Također, UP FBIH će zatražiti da se istovremeno uz ova dva zakona razmatraju i izmjene slijedećih zakona:

1. Zakon o porezu na dobit
2. Zakon o finansijskom poslovanju
3. Zakon o računovodstvu i reviziji

4. Zakon o profesionalnoj rehabilitaciji i zapošljavanju osoba sa invaliditetom

5. Zakon o zdravstvenoj zaštiti

6. Zakon o podsticajima

7. Zakoni kojima se tretiraju parafiskalni nameti.

Miljenko Crnjac je istakao da je neophodno izmijeniti zakonsku odredbu kojom se oporezivanje dividende vrši na dan isplate, dakle prema sistemu blagajne. Porezna obaveza ne treba da se veže uz trenutak donošenja odluke o isplati dividende.

Dakle, nastoji se spriječiti retroaktivno djelovanje Zakona o porezu na dohodak, na način da se ne oporezuje dividenda koja je ostvarena, a nije isplaćena, jer je ostvarena u periodu kada nije postojala obaveza plaćanja poreza na dividendu.

Primjedbe koje su predložene na članove Zakona o porezu na dohodak biće razmotrene i uvrštene u amandmane Udruženja poslodavaca FBiH na pomenuti zakon.





Mario Čulin, direktor Mljkare Livno

Inicijative Udruženja poslodavaca FBiH

Upravni odbor je usvojio inicijativu za donošenje Zakona o izmjenama i dopunama Zakona o zdravstvenom osiguranju FBiH, kao i inicijativu kompanije DM drogerie markt za usklađivanje članova zakona RS-a i FBiH koji tretiraju deklaraciju proizvoda i inicijativu u vezi sa zamjenom etiketa za cijene. Inicijative DM drogerije markt će se uputiti Grupaciji poslodavaca iz oblasti trgovine na raspravu, a konačni tekst bit će upućen inistitucijama na razmatranje.

Interne odredbe

Direktor UP FBiH je upoznao članove UO UPFBiH da je raniji direktor Željko Marijan napustio Mljkaru Livno, a obnašao je funkciju člana Upravnog odbora Udruženja. Shodno navedenom, imenovan je novi direktor Mljkare Livno Mario Čulin za člana Upravnog odbora. Također, imenovan je Muhamed Šaćiragić kao predstavnik Udruženja u Radnoj grupi za izradu Nacrta strategije zapošljavanje u BiH 2017-2020.



Prihvaćena inicijativa UPFBiH za izmjenu Zakona o porezu na dobit



S ciljem stvaranja povoljnijeg poslovnog ambijenta, Udruženje poslodavaca FBiH je napravilo tekst prijedloga Zakona o porezu na dobit. Tekst je dostavljen Ekonomsko-socijalnom vijeću FBiH i razmatran na sjednici (08.06.2017.) ESV-a. Ekonomsko-socijalno vijeće FBiH je prihvatio inicijativu Udruženja za izmjenu Zakona o porezu na dobit, te je, s tim u vezi, predložilo Vladi FBiH da formira interresornu radnu grupu, u koju bi bili uključeni predstavnici više ministarstava i koja će sa predstavnicima Udruženja poslodavaca FBiH razgovarati o prijedlogu izmjena zakona.

Osnovu predloženih izmjena čine zahtjevi za oslobođanje plaćanja poreza na dobit za one privredne subjekte, koji svoju dobit reinvestiraju u stalna sredstva. To je bitna izmjena u odnosu na postojeće rješenje koje nije stimulativno. Takođe proširena je kategorija sredstva u koje se može investirati

uz primjenu poreske olakšice.

Udruženja poslodavaca FBiH predlaže da se smanji stopa poreza na dobit sa deset na osam posto. Smanjenjem ove stope djeluje stimulativno za nove investicije, naročito strane, a također, smanjenjem postići najmanje neutralan efekat naplate poreza.

Nadalje, Udruženje smatra da poreske olakšice za zapošljavanje osoba sa invaliditetom trebaju biti regulisane ovim zakonom, tako da smo predložili poreski poticaj u visini četvorostrukog iznosa bruto plate za svaku zaposlenu osobu sa invaliditetom.

Također, Udruženje traži da se poraznom obavezniku koji je u godini za koji se utvrđuje porez na dobit ostvario prihod po osnovu izvoza, umanjuje se obaveza obračunatog poreza za onoliko procenata koliko prihod ostvaren izvozom učestvuje u ukupnom prihodu za tu godinu.

Predložili smo izmjenu 33 člana koji će znatno uticati na poboljšanje poslovnog ambijenta.

Prijedlog Zakona o izmjenama i dopunama Zakona o porezu na dobit možete preuzeti sa straice Udruženja poslodavaca FBiH.

Na sjednici ESV-a FBiH podnesene dvije inicijative - za izmjene i dopune akona o porezu na dobit i privrednim društvima

Federalni ministar energije, industrije i rudarstva Nermin Džindić je na sjednici (08.06.2017.) Ekonomsko-socijalnog vijeća za teritoriju Federacije BiH zaključio da će radna grupa ministarstva razmotriti sve sugestije članova ovog vijeća u vezi izmjena i dopuna Zakona o privrednim društvima, koje su predložili sindikalci.



- Sindikalci su inicirali zakonske izmjene, jer traže da se utvrdi stvarna odgovornost pojedinih direktora uprava koje dovode do likvidacija i blokada firmi - rekao je predsjednik Saveza samostalnih sindikata BiH Ismet Bajramović.

Sindikalci insistiraju da se „ukoliko društvo posluje s gubitkom članovima uprave ugovorena plaća smanji na iznos prosječne plaće u FBiH“. Za sindikalce je neprihvatljivo da pojedini menadžeri zarađuju i 15 puta više nego radnici u preduzeću u kojem upravljaju,

zbog čega smatraju da se takva ugovorena primanja moraju ograničiti i vezati za primanja radnika ili za prosječnu plaću u Federaciji BiH.

U tom smislu ministar Džindić je istakao da je većini direktora javnih preduzeća u njegovom resoru limitirao plate na iznos oko 3.000 KM, navodeći da je to iznos i njegove ministarske plate.

Način na koji sindikalci žele da se utvrdi odgovornost direktora firmi nije prihvatljiv s pravnog gledišta, smatraju poslodavci.

Direktor Udruženja poslodavaca FBiH Mladen Pandurević smatra da važeći Zakon o privrednim društvima nudi puno bolja rješenja, jer predviđa odgovornost članova uprave i nadzornih odbora koji odgovaraju svom svojom imovinom za štetu koju su nanijeli preduzeću za svoje odluke.

Osim ovih zakonskih izmjena na sjednici ESV-a razmatrane su i izmjene i dopune Zakona o porezu na dobit, koje su inicirali poslodavci s namjerom da dođe do oslobođanja poreza na dobiti u smislu reinvestiranja.

- Po važećem Zakonu reinvestiranje je

povoljno samo za velike investitore koje investiraju više od 20 miliona KM u toku pet godina. To može samo nekoliko firmi u Federaciji, te smo htjeli kroz zakonske izmjene da i male firme, koje investiraju desetine ili stotine hiljada KM, budu stimulirane da investiraju u proizvodnju opremu i slično - rekao je predsjednik Udruženja poslodavaca Federacije BiH Adnan Smailbegović.



Također, poslodavci su predložili smanjenje stope poreza na dobit sa deset na osam posto.

Zamjenik premijera FBiH i federalni ministar rada i socijalne politike Vesko Drljača na sjednici Ekonomsko-socijalnog vijeća za teritoriju FBiH dao je presjek aktivnosti u vezi s kolektivnim ugovorima.

- Pregовори oko kolektivnih ugovora traju već duži vremenski period, te su zaključeni kolektivni ugovori za područje i djelatnosti državne službe, sudske vlasti i javnih ustanova FBiH, zatim granski kolektivni ugovori o

pravima i obvezama poslodavaca i radnika u oblasti rudarstva, šumarstva, kao i za područje elektroprivredne djelatnosti FBiH, željeznice, poštanskog prometa, zdravstva - kazao je Drljača.



Dodao je i da je zaključen okvirni kolektivni ugovori o pravima i obvezama poslodavaca i radnika u oblasti komunalne privrede za teritoriju FBiH, kolektivni ugovor za djelatnost prozvodnje i prerade metala, drvne i papirne industrije, te u oblasti prometa.

- U dobrom dijelu je urađen jedan kvalitetan posao, ali u narednom periodu treba okončati još devet kolektivnih ugovora - kazao je ministar Drljača.

Preostali kolektivni ugovori tiču se telekomunikacija, srednjeg obrazovanja, doktora medicine i stomatologije, policijskih službenika, hemije i nemetala, tekstila, obuće, kože i gume, nafte i petrohemije, te oblasti finansija.

Okrugli sto – Inicijativa bh. privrednika za plaćanje PDV-a po naplaćenim računima

Institut za razvoj mladih KULT je 24. maja 2017. godine održao okrugli sto u Sarajevu pod nazivom „Inicijativa bh. privrednika za placanje PDV-a po naplacenim racunima“.

Na okruglom stolu su učestvovali:

1. Adnan Bukva

Udruženje poslodavaca BPK Goražde

2. Ajka Baručić

Institut za razvoj mladih KULT

3. Arnel Hodžić

Udruženje „Kupujmo i koristimo domaće“

4. Belma Hasić

Vanjskotrgovinska komora BiH

5. Dženana Hodžić

Privredna komora Federacije BiH

6. Emir Ražanica

Centrotrans Eurolines d.d. Sarajevo

7. Jasmin Bešić

Institut za razvoj mladih KULT

8. Jasmin Emrić

Zastupnički dom PS BiH

9. Lejla Šepić

Privredna komora Federacije BiH

10. Mensura Beganović

Zastupnički dom PS BiH

11. Mubera Kadrić

Privredna komora Kantona Sarajevo

12. Nejra Neimarlija-Roić

Institut za razvoj mladih KULT

13. Robert Vidović

Komisija za finansije i budžet Doma naroda

Parlementarne skupštine BiH

14. Sanjin Purgić

Predstavništvo njemačke privrede u BiH (AHK

BiH)

15. Saša Magazinović

Zastupnički dom PS BiH

16. Šefika Cengić

„Eco ambalaža“ d.o.o. Goražde

17. Ševal Sukljanović

Udruženje poslodavaca Brčko Distrikta

18. Zdenka Džambas

Dom naroda Parlamentarne skupštine BiH

19. Zlatan Dedić

Udruženje poslodavaca Federacije BiH



Okruglim stolom je moderirao **Vjekoslav Domljan.**

Tokom rasprave ukazano je da je trenutni sistem PDV-a u Bosni i Hercegovini konzervativan i rigidan. Konzervativan je stoga što su prilikom njegovog uvođenja izabrani oni elementi koji su najprihvatljiviji za državu, a nauštrb poslovnog sektora.

Za razliku od BiH, kod koje se porez plaća do desetog u mjesecu, tipična EU praksa je do 20. u mjesecu, a u pojedinim zemaljama se plaća i do 10. odnosno 15. u slijedećem mjesecu tj. 40 odnosno 55 dana po isteku obračunskog perioda.

Napomenuto je i da postoji različita praksa dužine obračunskog perioda. Kod nekih zemalja, kao i kod BiH, taj period iznosi mjesec dana, no ima zemalja kod kojih iznosi dva, tri, četiri ili šest mjeseci.

Postoje i različiti pragovi za način obračuna PDV-a. Naime, izuzev praga za ulazak u sistem PDV-a (kod BiH iznosi 50.000 KM) postoji i prag koji razdvaja obračun PDV-a po naplaćenoj realizaciji (cash accounting scheme) od onog po obračunatoj realizaciji.

Taj prag se kreće oko 400.000 eura.

tolerira privatnim preduzećima, inspekcijski nadzor nad javnim preduzećima se ne prakticira dok se prakticira nad privatnim preduzećima. Razlika se očituje i kod kaznenih odredbi za neplaćanje PDV-a (500 KM), što se u pravilu prakticira kod privatnih preduzeća, ali ne i kod javnih preduzeća.

U raspravi je spomenuto i pitanje „neopažene“ ekonomije, u smislu da olakšavanje fiskalnog tereta poduzetnika stvara osnovu za urednije plaćanje poreza i smanjenje poticaja za bježanje u „podzemlje“. To će voditi proširenju porezne osnove i povećanim poreznih prihoda.

Također će i porezni moral biti na većem nivou. Bilo bi korisno razmotriti iskustva zemalja s raširenom neopaženom ekonomijom sa stanovišta načina obračuna PDV-a. Dobar primjer je Meksiko koji je 2014. uveo novi režim plaćanja poreza za male porezne obveznike tj. pojedince koji vrše poslovne aktivnosti prodaje roba i usluga za što nisu potrebne nikakve kvalifikacije, uz uvjet da dohodak ne prelazi dva miliona pezosa (oko 190.000 KM).

Porezni obveznici s dohotkom manjim od 10.000 KM mogu se prijaviti za oslobođanje od PDV tokom 10-godišnjeg razdoblja, pa je tako u prvoj godini oslobođanje 100%, u drugoj 90% te u 10. godini 10%.



Učesnici su nametnuli i pitanje visoke zatezne kamate za neplaćanje PDV-a koja iznosi 0.04 posto dnevno. Zbog izrazito visoko kamate, poduzetnicima se isplati „zamijeniti“ dug za neplaćanje PDV-a s bankovnom dugom, jer je kamatna stopa na bankovni dug niža, stoga je nužno smanjiti visinu zatezne kamate na visinu bankovne kamate.


Posebno je istaknuta teška pozicija privatnih spram javnih preduzeća - vlast tolerira neplaćanje PDV-a javnim preduzećima dok ne

Nadalje je spomenuto i pitanje nepostojanja modelske kulture tj. nerazvijenosti postupaka ocjene ekonomskih, socijalnih i fiskalnih efekata promjena poreznog sistema. Radi se o tome da nema primjene ekonometrijskih istraživanja općenito, pa tako i u ovoj oblasti, stoga u BiH i ne postoje politike utemeljene na dokazima (evidence based policy) nego se prakticira politika utemeljena na mišljenju (opinion based policy).

U takvoj situaciji nije lako predlagati promjene poreznog sistema, pa tako i promjene metoda obračuna PDV-a. Posebice je to teško sa stanovišta vremenskog rasporeda efekata promjene sistema obračuna – nedvojbeno je da će najveći negativan efekt po javne prihode biti u prvoj godini uvođenja sistema, o čemu treba posebno povesti računa.

U BiH se ne vodi uopće računa o tome da je ista stopa PDV-a za kapitalom intenzivne djelatnosti (npr. elektroprivrede) i radom intenzivne djelatnosti (npr. kejtering). Potrebno je s tim u vezi koristiti primjere čak razvijenih zemalja koje koriste olakšice kod plaćanja PDV-a u slučaju radom intenzivnih djelatnosti. Primjerice, Belgija ima nižu stopu PDV-a za usluge kejteringa (12% s prema standardne stopi od 21%) radi ublažavanja fiskalnog tereta za ovaj radom intenzivni sektor. I druge europske zemlje imaju također

niže stope PDV-a za radom intenzivne djelatnosti. Čak u razvijenim zemljama (OECD i G20) se vodi računa o olakšavanju tereta za male biznise. Te olakšice spadaju u tri kategorije: izuzeće od PDV režima, olakšavanje obračuna PDV-a i olakšavanje knjiženja, administriranja i plaćanja PDV-a.



Zaključak okruglog stola je da rigidnost sistema PDV-a se treba ukinuti. Prošlo je desetljeće od uvođenja PDV-a, u međuvremenu se desila globalna kriza, koja je ostavila tragove na likvidnost poslovnog sektora. Pored ovoga treba uzeti u obzir da je prema Doing business BiH posljednja u Europi i da je među pojedinim elementima poslovanja, npr. otpočinjanja poslovanja, među posljednjim ekonomijama na svijetu. Vlast bi trebala stoga izmijeniti neke elemente PDV-a i time signalizirati poslovnom sektoru da namjerava poboljšavati poslovnu klimu, primjerice mijenjajući barem rok plaćanja s 10. na 15. u mjesecu.

Ekonomski savjet Vlade FBiH: Održan prvi sastanak predstavnika akademske zajednice, vlasti i privrednika

Premijer Federacije Bosne i Hercegovine Fadil Novalić i članovi Ekonomskog savjeta Vlade FBiH na čelu s predsjednikom Vjekoslavom Domljanom, osnovanog u maju ove godine, razgovarali su 06.06.2017. godine o mogućim modalitetima podrške Vlade izvoznicima i stimulaciji privrede uopće.



Na press-konferenciji održanoj nakon sastanka, premijer Novalić je izjavio da Vlada želi iskoristiti znanje i pomoći članova Ekonomskog savjeta, odnosno akademske zajednice, u realizaciji programa rada i Reformske agende.

- Mada je današnja tema prвobitno najavlјena kao mogućnosti podrške izvoznoj privredi, rasprava je proširena na poticaj privredi uopće - rekao je premijer Novalić.

Predsjednik Ekonomskog savjeta Vlade FBiH Vjekoslav Domljan, izjavio je da zaključaka sa sastanka još nema jer se diskusija tek „zahuktala”, ali i da je njegovo mišljenje da Vlada mora pomoći izvoznicima da povećaju izvoz makar za pet posto. Dodao je i da im fiskalnim mjerama mora olakšati trku s konkurentima na inostranim tržištima.

„Bosna i Hercegovina, prema podacima Svjetske banke, je posljednja u Evropi što se tiče povoljnosti poslovnog ambijenta, svega desetak zemalja ima lakše uvjete prilikom započinjanja poslovanja. Danas smo na sastanak pozvali prvenstveno izvoznike koji poznaju poslovni ambijent naše, ali i drugih zemalja u koje izvoze, kako bi dali prijedloge o tome šta je najlošije i šta se može najbrže ispraviti, a što je u nadležnosti Vlade Federacije BiH“, istekao je Domljan.

Kad je riječ o stranim investitorima, oni traže predvidiv fiskalni okvir u zemlji, napomenuo je Domljan.

Po riječima premijera Novalića, Vlada želi smanjiti opterećenja privredi i regulirati tržište rada.

Sa Ekonomskim savjetom će se konsultirati ubuduće i u oblasti poreza, te zakonu o šumama, naprimjer, kao i drugim pitanjima.

- Vlada provodi kompleksne reforme i želimo ih provesti u svim oblastima jer su jednako važne da bi se bolje živjelo u Federaciji, odnosno Bosni i Hercegovini - rekao je federalni premijer.



Na novinarsko pitanje o Reformskej agendi, Novalić je odgovorio da tu zastoj postoji, ali da Vlada kontinuirano radi i da je stavila u proceduru gotovo sve potrebne zakone.

Izrazio je žaljenje što neki zakoni nemaju prohodnost u Parlamentu, pa je, primjerice, za izmjene Zakona o igrama na sreću, najavio da će ih Vlada nanovo staviti u proceduru.

Ekonomski savjet Vlade Federacije BiH osnovan je 19. maja ove godine, a čine ga doktori nauka predsjednik Vjekoslav Domljan i članovi Adisa Omerbegović - Arapović, Aziz

Šunje, Sead Kreso, Igor Živko, Matej Živković i Goran Miraščić.

Današnji sastanak je prvi nakon imenovanja tog tijela. Osim premijera i dva zamjenika premijera, prisustvovali su i čelnici Udruženja banaka BiH, Udruženja poslodavaca FBiH, te Upravnog odbora Udruženja stranih investitora BiH, kao i predstavnici 13 kompanija.

Zadatak ovog tijela je da savjetuje Vladu FBiH u vezi sa ekonomskom politikom, da analizira predložene zakonske i podzakonske akte i njihov mogući uticaj, kao i da Vladi samoinicijativno predlaže eventualne mjere i aktivnosti iz sfere ekonomije čiji su cilj održivi ekonomski rast i razvoj, kao i realizacija ciljeva utvrđenih programom rada Vlade, Reformskom agendom i Pismom namjere s Međunarodnim monetarnim fondom, ali ne ograničavajući se samo na ove ciljeve.

Savjet je ovlašten da kolektivno i samostalno komunicira sa širom društvenom zajednicom u vezi s reformskim mjerama.

Jedan od najznačajnijih aspekata je neovisnost Savjeta, široko razumijevanje ekonomске problematike i mogućnost neovisnog djelovanja.

Održana javna rasprava o Zakonu o štrajku

U Federalnom parlamentu 15.06.2017. godine održana je javna rasprava o Nacrtu zakona o štrajku, na kojoj su predstavnici Ministarstva rada i socijalne politike FBiH poručili da odredbe novog zakona štite prava radnika, dok su predstavnici sindikata ocijenili neprihvatljivim tekst Nacrta smatrajući da se radnicima ne trebaju ograničavati prava posebno u pogledu mjesta održavanja štrajka. Iz resornog ministarstva obrazloženo je da se novim zakonom prvi put definiše štrajk kao "organizovani prekid rada u privrednom društvu, ustanovi i kod drugog pravnog ili fizičkog lica".

- Ovo zakonsko rješenje uređuje postupak u kojem radnici, radi zaštite i ostvarivanja svojih profesionalnih interesa, ekonomskih i socijalnih prava, ostvaruju pravo na štrajk u Federaciji Bosne i Hercegovine – rekao je Ernis Imamović, predstavnik Federalnog ministarstva rada i socijalne politike.



Članom sedam propisano je da prije donošenja odluke o stupanju u štrajk da poslodavac i sindikat zajednički utvrđuju mjesto održavanja štrajka. Ukoliko ne dođe do dogovora predloženo je da se nastali spor povjerava tijelu za mirno rješavanje sporova, odnosno arbitraži.

Rješavanje nastalog spora o mjestu održavanja štrajka ne može trajati duže od tri dana od dana dostavljanja zahtjeva za sporazumno rješavanje tijelu predviđenom za mirno rješavanje nastalog spora. Odluka ovog tijela je obavezujuća i konačna i protiv nje se ne može uložiti žalba niti voditi sudski spor.

U slučaju da se poslodavac i sindikat ne usaglase o sastavu navedenog tijela rješavanje nastalog spora prepušta se nadležnom sudu. S navedenim odredbama sindikalci se ne slažu, te su predložili da se izbace odnosno izbriše kompletan član 7. navodeći da je u članu 6. stoji da se Odlukom o stupanju u štrajk utvrđuje, između ostalog, i mjesto održavanja štrajka.

– Ovo može biti još jedan potencijalni mehanizam blokade i opstrukcije, koji poslodavci mogu zloupotrijebiti, odnosno svojim pasivnim ponašanjem otežati i

onemogućiti organizaciju štrajka – rekao je stručni saradnik za pravne poslove Saveza samostalnih sindikata BiH Adis Kečo.

Također, sindikalci su mišljenja da se briše i član 10. koji se odnosi na mirno rješavanje sporova to jest da „štrajk ne može započeti prije okončanja postupka mirenja, odnosno prije provođenja drugog načina mirnog rješavanja spora o kojem su se strane sporazumjеле“. Propisano je da postupak mirenja ne može trajati duže od pet dana od dana dostavljanja zahtjeva tijelu za mirenje.

– Zakon o štrajku je veoma važan zakon i

saveza samostalnih sindikata Pandurević je poručio da su potpuno neosnovane primjedbe sindikata.

Do slanja u daljnju proceduru novog zakonskog rješenja o štrajku Federalno ministarstvo rada i socijalne politike će još jednom razmotriti sugestije iznesene na današnjoj raspravi.

– Nismo sigurni da će ono što se usaglasi s resornim ministarstvom dobiti zeleno svjetlo na sjednici Vlade FBiH. Po ovoj varijanti je nemoguće organizovati štrajk u skladu sa zakonom – istakao je predsjednik Samostalnog sindikata osnovnog obrazovanja i odgoja FBiH Selvedin Šatorović.

Novi zakon propisuje obavezu provođenja postupka mirnog rješavanja sporova, što znači da bi štrajkački odbor i pregovaračko tijelo koje odredi poslodavac bili dužni od dana dostavljanja odluke o stupanju u štrajk kao i za vrijeme trajanja štrajka, da pokušaju sporazumno rješiti nastali spor ili nastali spor povjeriti posebnom tijelu za mirenje koje strane u sporu sporazumno formiraju u skladu sa Zakonom o radu ili posebnim propisom.

Cilj ovog zakona je da štrajk bude krajnji oblik rješavanja kolektivnih radnih sporova i to onda kada nije moguće da se kolektivni spor riješi mirnim putem, odnosno nekim od oblika mirnog rješavanja.



Udruženje poslodavaca FBiH razumije povećane tenzije, koje upućuju članovi sindikata. Mislim da moramo razgovarati i naći rješenje koje će biti na tom nivou da i jedni i drugi dokraja budu cijenjeni – istakao je Mladen Pandurević, direktor Udruženja poslodavaca FBiH.

Navodeći da je tekst Nacrta zakona o štrajku plod dogovora Federalnog ministarstva rada i socijalne politike, udruženja poslodavaca i

Sastanak predstavnika GIZ-a sa UPFBiH

U prostorijama Udruženja poslodavaca Federacije BiH 13.06.2017. godine održan je sastanak direktora UPFBiH Mladena Pandurevića i koordinatora Udruženja Zlatana Dedića sa predstvincima GIZ-a - Brigitom Heuel-Rolf, regionalnom direktoricom za Zapadni Balkan i Isabellom Rapp, projekt menadžericom na kojem je predstavljena koncept nota projekta „Jačanje Centra za edukaciju Udruženja poslodavaca FBiH“.

Obzirom da postojeći obrazovni sistem u najvećem broju slučajeva ne pruža ono što je realna potreba poslodavaca, Udruženje poslodavaca Federacije BiH je iniciralo ideju o osnivanju Centra za edukaciju. Djelatnost Centra za edukaciju bi se zasnivala na principu cjeloživotnom učenja i bila fokusirana na

obučavanje (dokvalifikaciju i sticanje znanja i vještina) za poznatog poslodavca. Projekat uključuje dokvalifikaciju kadrova u kompanijama poslodavaca, obučavanje kadrova za nova tehnička znanja i vještine, kao i obrazovanje kadrova za poznatog poslodavaca u saradnji sa ministarstvima obrazovanja.

Na sastanku je razgovarano o mogućnosti da se GIZ uključi u podršku predloženom projektu. Međutim, zbog neispunjena GIZ-ovih kriterija neophodnih za dobijanje podrške, predstavnici GIZ-a su istakli da, nažalost, finansijski ne mogu podržati navedeni projekat. Razgovarano je i o mogućim opcijama buduće saradnje.

Četvrta radionica radne grupe za razvoj i testiranje kvalifikacijskog okvira u okviru projekta „Razvoj kvalifikacijskog okvira za cjeloživotno učenje – QF LLL”

U Hotelu Termag na Jahorini 01-02. juna 2017. godine održana je Četvrta radionica radne grupe za razvoj i testiranje kvalifikacijskog okvira (WG-1.1) u okvru projekta „Razvoj kvalifikacijskog okvira za cjeloživotno učenje – QF LLL“. Na radionici su učestvovali i predstavnici Udruženja poslodavaca FBiH. Učesnici su bili podjeljeni u grupe i diskutovali obrasce standarda kvalifikacija i standarde

zanimanja, strukturu smjernica i priručnike VET škole i centre za obrazovanje odraslih za pilotiranje, te procese za vrednovanje neformalnog i informalnog učenja. Nakon diskusije donesen je zaključak o navedenim dokumentima, te upute o metodologiji razvoja smjernica i uputa, uključujući razvoje svih standarda zanimanja i standarda kvalifikacija za pilotiranje.

Novi zakon o turizmu olakšava rad privrednicima u Federaciji BiH

Poslovni subjekti više neće plaćati članarine turističkim organizacijama, jedna je to od najvažnijih novina koju donosi zakon o turizmu u Federaciji BiH.



Dosadašnje zakonsko rješenje koje regulira oblast turizma u Federaciji BiH zahtjevalo je unapređenja i izmjene da bi rezultati s terena u narednom periodu bili što bolji. Bosnu i Hercegovinu prošle godine posjetio je 678.271 turist, od kojeg je ova privredna grana zaradila više od 660 miliona dolara ili više od milijarde i 174 miliona KM, podaci su iz novog izdanja Indeksa konkurentnosti turizma, koji svake godine priprema Svjetski ekonomski forum (WEF). Samo u Federaciji BiH u martu 2017. boravilo je 50.870 turista, što je za 12,3 posto više u odnosu na mart 2016., a u odnosu na februar ove godine više je za 54,4 posto.

Vođeni ciljevima iz Reformske agende kojom se predviđa i ukidanje parafiskalnih nameta, predloženim zakonom se ukida dosadašnja

obaveza plaćanja članarine. Poslovni subjekti u Federaciji BiH, bez obzira na djelatnost kojom se bave, dosad su na ime članarine bili obavezni plaćati 0,05 posto od ukupnog godišnjeg prometa. Ubuduće će to biti veliko olakšanje svim privrednicima osobito onima koji nemaju direktnu vezu s turizmom.

Predsjednik Udruženja poslodavaca FBiH Adnan Smailbegović kazao je da će novi zakon o turizmu u znatnoj mjeri pomoći privrednicima u FBiH, s obzirom na to da većina njih iz svoje godišnje dobiti izdvaja pozamašnu cifru za nešto od čega nemaju nikakvu korist.


"Mi smo već ranije Vladi Federacije BiH uputili prijedlog za ukidanje Uredbe o članarinama u turističkim zajednicama, između ostalog, zbog neusklađenosti odredbi Zakona o turističkim zajednicama i promicanju turizma u FBiH i Uredbe o članarinama u turističkim zajednicama FBiH saustavima FBiH i BiH, disproporcije u prihodu od turističke takse i doprinosa, te generalne potrebe za rasterećenje privrede. Naš prijedlog nije naišao na odobrenje tadašnje Vlade FBiH pa nas raduje da su ovi prijedlozi uvršteni u novi zakon", dodao je Smailbegović.

Vijeće stranih investitora još 2015. godine

pokrenulo je dijalog i započelo aktivnosti na smanjenju parafiskalnih nameta kao jednoj od mjera rasterećenja privrednika i poboljšanja poslovnog ambijenta. Kompanije okupljene u Vijeću smatraju da je predloženo zakonsko rješenje u skladu s programom ekonomskih reformi na koje se obavezala Vlada Federacije BiH koje za cilj imaju rasterećenje privrede.

"Članice Vijeća stranih investitora BiH smatraju da je jedan od ključnih ciljeva ekonomskih reformi ka boljem poslovnom okruženju, zapravo smanjenje parafiskalnih nameta. Tu se prije svega misli na namete koji se odnose na različite takse, naknade i članarine. To nisu takse, naknade i članarine koje se plaćaju za određene usluge, dozvole ili licence. Po svojoj prirodi to su zapravo porezi koji se prikupljaju od velikog broja, a ako ne i svih firmi. Tokom zadnjih godina njihov broj je povećan. Oni značajno doprinose troškovima poslovanja privatnim firmama i sprečavaju priliv stranih investicija. Nijedna mjeru ili izmjena sama po sebi neće nešto značajno poboljšati ukoliko nije dio sveobuhvatnih mjer koje trebaju rezultirati manjim poreznim opterećenjem za kompanije uz predvidiv i poticanj porezni okvir. Kada govorimo o konkretno o turizmu, važno je da se ta oblast legislativno uredi jednim sveobuhvatnim zakonom", kazao je predsjednik Upravnog odbora VSI Branimir Muidža.

Predloženim zakonom, među ostalim, predviđeno je formiranje registra svih turističkih subjekata, agencija, smještajnih kapaciteta i registrovanih turističkih vodiča s položenim ispitima čime bi se transparentnost podigla na mnogo viši nivo, a turistima olakšao dolazak i boravak u Bosni i Hercegovini.



Hamid Kurjaković, dugogodišnji turistički radnik i voditelj više projekata iz oblasti turizma, također naglašava značaj zakonskog i strateškog okvira za razvoj turizma, s obzirom na to da se radi o oblasti koja je veliki resurs za zapošljavanje, te valorizacije naših turističkih potencijala.

"Generalno je važno da se tačno koncipira koji je interes države za razvoj turizma, kao i da se koncipira uloga svakog segmenta i svih elemenata u ovoj oblasti. Smatram da je jako važno riješiti pitanja finansiranja i odabira dobrih kadrova koji rade u turističkim organizacijama", kazao je Kurjaković.

Poizvođači namještaja iščekuju donošenje novog zakona o šumama u FBiH

Proizvođači namještaja očekuju da se u Federaciji BiH što prije usvoji novi zakon o šumama, čime se stvaraju uvjeti za donošenje odluke o kriterijima za raspodjelu drvnih sortimenata iz državnih šuma - izjavio je predsjednik Asocijacije drvne industrije i šumarstva Vanjskotrgovinske komore BiH Suad Ećo.

Naime, neophodno je utvrditi koliko ko ima pravo na dodjelu sirovina na godišnjem nivou, pri čemu se sugeriše da prioritet imaju proizvođači namještaja finalnih proizvoda. Poznato je da imamo dva i po više prerađivačkih kapaciteta od raspoloživog etata sirovine.

"Način na koji se trenutno odvija gospodarenje šumama je upitan i neodrživ, te se drvna industrija susreće s mnogim problemima", istakao je Ećo.

Nacrtom Zakona o šumama definirano je da je "korisnik šuma obavezan šumske drvne sortimente prodavati po tržišnim cijenama i na transparentan način, a u skladu s propisom koji donosi Vlada FBiH kojim se regulira način prodaje šumskih drvnih sortimenata".

Jedan od kriterija za bodovanje kupaca iz navedenog stava jeste "stepen dovršenosti

proizvoda od drveta".

"Na osnovu toga, najveću prednost trebaju dobiti firme koje imaju finalni proizvod. Po drugom kriteriju, firme koje se bave preradom (pilane i prerađivači), a treći su trgovci koji trguju tom sirovinom", smatra Ećo.



Prema sadašnjem stanju, sirovina se izvozi i rasprodaju se resursi po najnižim mogućim cijenama, umjesto da se osigura drvo za domaće proizvođače.

"Dakle, sirovine ima dovoljno samo što nije kvalitetno raspoređena, a to znači da prvo treba zadovoljiti potrebe domaćeg tržišta, pa ako nešto ostane onda plasirati na druga tržišta. To mora biti kontrolirano", ističe.

U tom pogledu ukazuje da je Crna Gora prije tri mjeseca zabranila izvoz svojih sirovina, trupaca i poluproizvoda, a i u Hrvatskoj je ograničen izvoz.

Naglašava da će zbog nekontrolirane sječe

BiH veoma brzo ostati bez šume dodajući da se proizvođači ne slažu s činjenicom koja se proteklih dana pojavila u medijima da "ogroman kapital leži u šumama i da se taj resurs treba maksimalno iskoristiti".



"Slažemo se da se taj resurs treba iskoristiti ali samo kao osnovna sirovina za proizvođače namještaja, a ne kao 'trgovinska roba'. S maksimalnim iskorištenjem moglo bi doći do još veće nekontrolirane sječe šume i zato zagovaramo da se taj proces ograniči. Također, potrebno je podići svijest o korištenju vrsta drveta. Naprimjer, bukva se treba isključivo koristiti za proizvodnju namještaja, gdje postoji veći stepen obrade i veći koeficijent dodatne vrijednosti. Zato se ne smije dozvoliti da se takvo kvalitetno drvo koristi za ogrev ili u neke druge svrhe", poručio je.

Član Grupacije drvne industrije u Privrednoj komori FBiH Muhamed Pilav potvrdio je da je u znatnom porastu divlja sječa šume budući da u Federaciji BiH devet godina nema zakona o šumama.

"Procjena stručnjaka je da se više od 50 posto sortimenata ukrade. To pokazuje da najdragocjenijim resursom, koje je vlasništvo građana veoma loše upravljamo. Pored toga što se ova polovina nelegalno posiječe veća količina ide na izvoz u niskim fazama prerade u obliku daske i letve", ocijenio je Pilav.

Iz navedenog razloga, smatra da je neophodno što prije donijeti zakon o šumama da bi se stvorili uvjeti da se podzakonskim aktima odrede kriteriji za raspodjelu sirovine.

"Nadamo se da će ti kriteriji da favorizuju firme koje zapošljavaju najviše ljudi i koje stvaraju najveću dodatnu vrijednost. Sve vrste drveta lišćari i četinari trebali bi se isključivo koristiti za proizvodnju finalnih, a ne da se izvoze poluproizvodi, jer se prozvodnjom finalnih prozvoda stvara najveća korist za cijelo društvo", zaključio je Pilav povodom donošenja novog zakona o šumama u Federaciji BiH.

Uporedo s prijedlogom zakona o šumama Federalno ministarstvo poljoprivrede, vodoprivrede i šumarstva uradilo je Šumarski program FBiH, a u narednih mjesec do dva može se očekivati i završen dokument inventura šuma.

To su također dva strateška dokumenta koja uz zakon o šumama prave dobre pretpostavke za planiranje u oblasti šumarstva.

Bosanskohercegovački proizvođači opreme za policiju, vojsku i druge specijalne službe zatražili sastanak s ministrom sigurnnosti BiH



Proizvodnja vojne, policijske i taktičke opreme—KOTEKS

Bosanskohercegovački proizvođači opreme za policiju, vojsku i druge specijalne službe Zenko, Koteks, Men i Uslužnost zatražili su sastanak s Draganom Mektićem, ministrom sigurnosti BiH, zbog najavljenog usvajanja novog pravilnika o uniformi i opremi pripadnika policijskih agencija na nivou BiH.

- Koliko smo upoznati, pravilnik koji je u pripremi i koji treba da bude usvojen na Vijeću ministara BiH, napravljen je tako da praktično onemogućava domaćim firmama da mogu proizvoditi uniforme i na taj način svjesno se išlo na uvezenu robu, vjerovatno marke 5.11. Smatramo da domaći proizvodi i domaća proizvodnja moraju u najmanju ruku imati jednak tretman, stoji u pismu ministru Mektiću.

Dakle, novi pravilnik bi onemogućio domaće proizvođače da budu dobavljači policijskim agencijama na nivou BiH, a to su Granična policija, SIPA, Direkcija za koordinaciju policijskih tijela, Služba za poslove sa strancima i Agencija za školovanje policijskih kadrova.

- Ovih dana, ukoliko se niko ne oglasi, direktno ćemo zvati ministra Mektića da ga upoznamo detaljnije sa ovom problematikom. Ukoliko pravilnik kao takav bude usvojen, onda smo mi, proizvođači, u veoma nepovoljnom položaju. Pri tome će nam trebati nekoliko godina da sve to savladamo i prilagodimo poslovanje, ali opet je pitanje da li je moguće ikada dostići to što je traženo, ispričao je Haris Sejdić, direktor Koteksa.

Bekto Precisa planira osvajanje afričkog tržišta, Kamerun prva stanica

Poznata goraždanska kompanija Bekto Precisa planira osvajanje afričkog tržišta, a ove godine će njeni predstavnici posjetiti Kamerun radi razgovora o saradnji, piše Biznis Info.



U posjeti ovoj kompaniji prošlog mjeseca je boravio Dominique M. Saatenang, poslovni čovjek i potpredsjednik Kinesko-afričke asocijacije investitora.

Ovom prilikom je obišao pogone te izrazio zadovoljstvo viđenim. Sa menadžmentom kompanije razgovarano je o osvajanju tržišta afričkog kontinenta a naročito Kameruna.

Na sastanku je dogovorena posjeta Kamerunu, koju će krajem godine predvoditi Enisa Bekto, generalna direktorica goraždanske kompanije.

Saatenang je nedavno boravio i u Sarajevu kao predstavnik dvije velike kineske kompanije koje su izrazile želju da investiraju u izgradnju novog stadiona Koševo, zajedno sa pratećim objektima, hotelom, tržnim centrom i garažama.

Centrotrans Eurolines otvorio autobusku stanicu u Fojnici

Generalni direktor kompanije Centrotrans Eurolines i načelnik Općine Fojnica 24. maja 2017. godine su svečano otvorili novu autobusku stanicu u Fojnici.

Izgradnja autobuske stanice predstavlja jedan od najznačajnijih infrastrukturnih projekata u općini Fojnica, kao i jednu od najvažnijih investicija kompanije Centrotrans Eurolines u protekloj godini.

Izgradnja moderne autobuske stanice doprinijet će kvalitetnijem životu građana Fojnice, te bolju povezanost sa drugim dijelovima BiH.

- Svim građanima općine Fojnica, privrednim kolektivima, obrazovnim institucijama, sportskim i kulturnim organizacijama, te općinskim strukturama na čelu sa načelnikom Klisurom, želimo iskazati zahvalnost

Centrotransa i njegovih uposlenika na ukazanom povjerenju. Činimo sve u interesu građana općine Fojnice da ukazano povjerenje opravdamo kvalitetnim uslugama i prijevozom. Sigurni smo da će novoizgrađena autobuska stanica tu kvalitetu podići na još veći nivo - istakao je generalni direktor kompanije Centrotrans Eurolines, Safudin Čengić.

Načelnik Općine Fojnica Sabahudin Klisura rekao je da se dugo čekalo da se napokon putnicima, gostima koji dolaze u Fojnicu, ali prvenstveno građanima ovog grada, na upotrebu predaje ovaj značajan objekat.

- Zahvaljujem se kompaniji Centrotrans Eurolines koja je prepoznala značaj izgradnje autobuske stanice za Fojnicu, te u zaista kratkom roku realizovala ovaj projekat - kazao je Klisura.



Novu autobusku stanicu čine stanična zgrada, autobuski prostor sa pet perona i pješački plato koji će u potpunosti zadovoljiti sve potrebe putnika i omogućiti bržu i bolju organizaciju prijevoza.

U neposrednoj blizini autobuske stanice bit će izgrađena i savremena stambeno poslovna zgrada sa 78 stanova i 6 poslovnih prostora, kao i parking za putnička vozila.

Prevent obara rekorde i najavljuje nove akvizicije

Predsjednik Uprave Prevent BH, Haris Rahman, govorio je o kontinuiranom rastu poslovanja Prevent grupacije, izazovima i prilikama.

– Krajem prošle godine smo preuzeli nekoliko kompanija, od čega bih istaknuo poznati njemački brend "Alno" koji proizvodi kuhinje, i vodećeg proizvođača električnih kablova u

Jugoistočnoj Evropi "Elka" Zagreb, rekao je Rahman.

Rahman je ovo kazao u intervju koji je objavljen u printanom izdanju magazina Lumen na engleskom jeziku a BiznisInfo ekskluzivno donosi najzanimljivije detalje razgovora.

– Svake godine slavimo sa svojim uposlenicima

nakon što napravimo milion garnitura presvlaka za automobile. Želimo da im zahvalimo što su naša najveća prednost, bez koje ovaj uspjeh ne bi bio moguć. Ove godine namjeravamo da proizvedemo dva miliona garnitura. S obzirom da jedan komplet čini sedam dijelova (prednja i zadnja sjedišta i naslonjači za glave), to znači da ćemo proizvesti 14 miliona dijelova za evropsko tržište automobila, kazao je Rahman.

Istaknuo je da Prevent pravi dijelove za vodeće proizvođače automobila kao što su Ford, VW, Škoda, Audi, Seat, BMW, Nissan, Citroen, Peugeot i drugi.

Proizvode autopresvlake i sve komponente za sjedišta i interijere u prijevoznim sredstvima te kožu, tekstil, kočione diskove, strukture za sjedišta, komponente za kočione sisteme, metalne dijelove motora i sistema transmisije i pogona vozila.

Prevent je isporučio dijelove za više od četiri miliona automobila napravljenih u Evropi, što znači da svaki četvruti automobil napravljen u Evropi ima Preventov dio koji je napravljen u BiH.

Prošle godine postali su jedan od glavnih snabdjevača Britaxa, proizvođača dječijih autosjedalica. Osim toga, ekskluzivni su proizvođač za poznati brend opreme za motocikliste Dainese.

– Zahvaljujući ovim projektima povećali smo

broj zaposlenih u BiH. Osim autoindustrije, naši proizvodi se prodaju u luksuznim radnjama slavnih modnih brendova. Već tri godine smo uključeni u proizvodnju odjeće a nedavno smo počeli proizvoditi i obuću. Koristim ovu priliku da ekskluzivno najavim akviziciju još jedne kompanije za proizvodnju odjeće, kazao je direktor Preventa.

Dodao je da je Prevent Safety jedini proizvođač zaštitnih rukavica i visoko-kvalitetne zaštitne opreme u BiH, dok je njihova kompanija Saniteks najveći proizvođač gaza i medicinskih sredstava u regionu. Postali su i jedan od vodećih igrača u industriji namještaja kada su kupili vodeći njemački brend u ovoj oblasti.

– Osim toga, u BiH dizajniramo interijer za luksuzne jahte koje proizvodi naša druga članica, kompanija Salona u Splitu. Ove godine Salona obilježava 15 godina postojanja a, među mnogim uspjesima, izdvajamo nagradu "Brod godine u Americi" koju smo dobili, rekao je Rahman te zaključio:

– Kao što vidite, grupa je orijentisana ka evropskom tržištu, gdje izvozimo većinu svojih proizvoda. No, kroz druge segmente našeg biznisa, kao što su proizvodnja kablova i medicinske i zaštitne opreme, širimo poslovanje na Sjedinjene Države, Aziju i Sjevernu Afriku.

HT Eronet ostvario dobit od 7,59 mil KM u 2016.

Hrvatski telekom d.d. Mostar ostvario je u 2016. godini neto dobit od 7,59 mil KM, izvještava Indikator.ba na osnovu finansijskog izvještaja kompanije.

Finansijski rezultat znatno je bolji nego godinu ranije kada je dobit bila 1,87 mil KM.

HT Mostar je ostvario poslovne prihode od 207,07 mil KM, što za oko 5,9 mil KM manje nego godinu ranije. Poslovni rashodi bili su manji nego 2015. godine za 6,3 mil KM i iznosili su 211,85 mil KM. Gubitak od

poslovnih aktivnosti iznosio je 4,78 mil KM (5,19 mil KM u 2015. godini).

Bolji finansijski rezultat kompanija ima prvenstveno zahvaliti većim dobicima od finansijskih aktivnosti i dobiti po osnovu ostalih prihoda i rashoda. Kad je riječ o ostalim prihodima i rashodima ključni su bili otpisi obaveza, ukinuta rezervisanja i ostali prihodi.

Broj zaposlenih smanjen je za godinu dana za 70 na 1.378.

Univerzitet u Zenici i Arcelor Mittal potpisali su okvirni sporazum o naučno-tehničkoj saradnji.

Saradnja između visokoškolskih ustanova i privrednih subjekata trebala bi osigurati bolje poslovanje i stručnije kadrove na tržištu rada, ali i napredak u naučno-istraživačkom radu.

Kako objašnjava Dževad Zečić, rektor Univerziteta, on definiše međusobne dogovore i saradnju u svakom segmentu poslovanja - od ekspetiza do obavljanja praksi studenata Univerziteta u Zenici.

Arcelor Mittal od Univerziteta očekuje tehničko-tehnološko unapređenje kad je riječ o novim dostignućima, te podršku studenata i

profesora u rješavanju novonastalih problema. S druge strane obavljati praksu u najvećoj kompaniji u regiji ima veliki značaj za studente i njihovu šansu na tržištu rada.

„Samo u posljednje dvije godine kod nas je počelo raditi oko 50 mladih inžinjera koji su završili fakultet ovdje. Ali ja znam da oni još uvijek nisu potpuno spremni za rad. Ovaj memorandum o razumijevanju pomoći će nam da premostimo taj jaz i da obrazujemo te mlade da budu spremni za rad“, istakao je Biju Nair, generalni direktor Arcelor Mittala Zenica.



NoLimit Premium

Premium korisnici zaslužuju **premium** paket...

Neograničen mobilni internet *

Neograničeni razgovori *

Neograničeno slanje SMS poruka prema svim mrežama u BiH *

Svi telefoni iz ponude BH Telekoma za samo **1 KM**

Mjesečna pretplata iznosi 170 KM sa PDV.

*Neograničen mobilni internet, neograničeni razgovori, neograničeno slanje SMS poruka na fer principu (korištenje po fer principu podrazumejava **30 GB** mobilnog interneta po maksimalno mogućoj brzini prijenosa, **5000 minuta** razgovora unutar mobilne i fiksne mreže BH Telekoma, **1000 minuta** razgovora prema drugim fiksnim i mobilnim mrežama u BiH, **1000 SMS** poruka prema mobilnoj i fiksnoj mreži BH Telekoma, kao i drugim mobilnim mrežama u BiH).



www.bhtelecom.ba
Dajemo više. BH Telecom





UDRUŽENJE POSLODAVACA FBiH

MULA MUSTAFE BAŠESKIJE 12/3, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba